



ISUMAQATIGISSLUT

Sulinermik Inuussutissarsiuteqartut Kattuffiata (SIK)

aamma

Royal Greenland A/S

akornanni

Kilisaatini inuttat tunngatillugu
2 - 2-imik aaqqissuusineq pillugu

1.april 2024-miit - 31. marsip 2026-mut

Imarisai

§ 1 - Isumaqtigiissummi pineqartut.....	4
§ 2 - Piffissaq suliffik.....	4
§ 3 - Atorfinititsinerup aallartinnerani.....	5
§ 4 - Aalisarnerup sivisussusaa.	5
§ 5 - Inuttanut akissarsiarititat akiliutillu allat.....	6
§ 6 - Akissarsisitsinerit il.il.....	7
§ 7 - Umiarsualivimmuinneq.....	7
§ 8 - Misileraalluni aalisarneq.....	7
§ 9 - Avataasiornermiit amutsivimmut.....	8
§ 10 - Ukiut suliffigisimasat sivisussusaat aallaavigalugit tapisiat.....	8
§ 11 - Soraarnerussutisiassanut akiliutissat taakkualu akilerneqartarnerat.	9
§ 12 - Qaangiuttoornerit.....	9
§ 13 - Sulinngiffeqarnerit.....	10
§ 14 - Angalanerit.	11
§ 15 - Atorfimmut atatillugu angalanermi aningaasartuutaanerusut.	12
§ 16 - Feeriarneq feriarnersiuteqarnerlu.....	12
§ 17 - Napparsimaneq aamma sulitillunilu ajoquserneq.	13
§ 18 - Qasuersaartussaatitaaneq.....	15
§ 19 - Toqukkut qimagaanersiutit.....	15
§ 20 - Sulinngikkallarnerit immikkut ittut allat.	15
§ 21 - Qinikkatut pisortanillu toqqakkatut suliassaqartitaaneq.	17
§ 22 - Naartuneq, ernineq qitornavissiartaarnerlu.	18
§ 23 - Isumaqtigiinngissutit kinaassusersiortumillu soraarsitsinerit.	19
§ 24 - Soraarsitsineq / soraarniuteqarneq.....	19

§ 25 - Sulisut sinnisaat	19
§ 26 - Taarsiissuteqartarneq.....	20
§ 27 - Aningaasaateqarfik.	20
1. Qaammarsaanermut Ilinniarnissamullu Aningaasaateqarfik.	20
2. Sulinngiffeqarluni angalermut aningaasaateqarfik.	20
3. Isumaginninnermut Aningaasaateqarfik.....	20
§ 28 - Isumaqtigiissutip atortuulerfia atorunnaarsinnejnarneralu.....	20

§ 1 - Isumaqtigiissummi pineqartut.

Isumaqtigiissummi matumani pineqarput Royal Greenland A/S-ip kilisaataani 300 BRT sinner-lugu angissusilinni inuttat isumaqtigiissutini malittarisassaniluunniit allani ilaatinneqanngitsut makkuusut:

- 1) Igasut,
- 2) Trawlbas-it,
- 3) Tunisassiornermi aqutsisut,
- 4) Usilersuinermi aqutsisut,
- 5) Aalisartut aamma iggavimmi ikiortit saqisullu,
- 6) Maskinalerisutut ilinniartut,

Imm. 2. Illuatungeriit arlaata atugassarititaasut allat isumaqtigiinniutiginissaat piumasaqaa-tiginngippassuk, isumaqtigiissut manna Kalaallit Nunaata aalisarnermut killeqarfiata avataa-ni aalisarnermi aamma atuutissaaq.

Imm. 3. Atorfininnermut allagartaq suliarineqassaaq imm. 1-mi kilisaammi inuttanut. Atorfininnermut allagartaq suliarineqartup assilineqarnera kilisaammi inuttamut aamma SIK-mut nassiunneqassaaq.

Imm. 4. Isumaqtigiissut malillugu atorfinititineq atuutissaaq atorininnermut allagartami ulluliussq malillugu.

Imm.5. Isumaqtigiissut atorfeqartup ikinerani /inuttanngornerani tunniunneqassaaq.

§ 2 - Piffissaq suliffik.

Sulineq ima aaqqissuunneqartassaaq:

- Angallammi ingerlaannartumik qaammatini marlunni, kipisaqattaanngitsumik.
- Qaammatit marlut naaneranni qaammatit marlut sivisuseqartumik kipisaqattaanngitsumik sulinngiffeqartitsisoqaartassaaq, tamatuma kingorna periuseq taanna ingerlateqqinneqartassalluni.

- Ingerlatsinerup mianerisariaqarnera naapertorlugu piffissat suliffiusussat sulinngiffeqarfiusussallu iluarsartuunneqartarsinnaapput.
- Angalanermi piffissaq suliffiusussaq kilisaataatilimmit pilersaarusiugaq kilisaammi inuttanit malinneqassaaq.

Imm. 2. Piffissat qasuersaartussaatitaanerit pillugit § 18 – Qasuersaartussaatitaaneq innersuunneqarpoq.

Imm. 3. Kilisaatip umiarsualivimmierani kilisaammi inuttat pisussaapput ullut tamaasa nal. akunneri arfineq pingasut sulinissamut, aamma sapaatini nalliuuttunilu

Imm. 4. Kilisaat amutsivimmittillugu sapaatip akunneranut piffissaq suliffiusussaq nal. akunneri 40-pput, sapinngisamik arfininngornermi aamma sapaatini nalliuuttunilu suli-neq pinaveersaartinneqassalluni.

§ 3 - Atorfinititsinerup aallartinnerani.

Isumaqtigiissut una tunngavigalugu atorfinititsinermi imaluunniit soraarsitsinermi, allakkat assigi SIK-p mail-ianut: sik@sik.gl-imut nassiunneqassaaq.

Imm. 2. Kilisaammi inuttap atorfinititsinermut allagartap atsiunnginnerani imarisaata misissornissaanut aammalu imarisaanut tunngatillugu siunnersortissinnaanerminut periarfissinneqarsimassaaq. Atorfinititsineq atuutilissaaq atorfinititsinermut allagartami ulluliussaq tunngavigalugu.

Imm. 3. Aalisarnermi avataaniinnermilu kilisaammi inuttat pisussaapput suliassat ingerlatsinermi pisaria-qartutut suliassiissutigineqartut allallu suliarisarnissaannut.

§ 4 - Aalisarnerup sivisussusaa.

Piffissaq aalisarfik naatsorsorneqartassaaq ullormiit kilisaatip aalisariarluni aallarfianiit Kalaallit Nunaanni umiarsualivimmut kilisaatip usingiaajartorluni tikiffiata tungaanut aqaguani ilanngullugu, taannalu ilanngullugu. Kilisaat aalisarfimminiit umiarsualivimmut Kalaallit

Nunaata avataaniittumut toqqaannarluni usingiaajartorpat ulloq aalisarfik kingulleq piffissap aalisarnerup naammassineraniit ullaatappaattut naatsorsorneqassaaq, tamatumalu kingorna amutsivinniinnerni akissarsiaqartitsineq malillugu akissarsiaqartitsisoqassalluni, tamatumani amutsivimmukarluni amutsivimmeereerlunilu angalanertut akissarsiarititat akissarsiaritinnejassallutik.

§ 5 - Akissarsiarititat akiliutillu allat.

Kilisaammi inuttat aalisarnerup nalaani qaammammut aalajangersimasumik aalisarnertut akissarsia-qartinneqartassapput kiisalu aningaasat kaajalukaartitat procentiata aalajangersimasup nalin-ganik bonusisiaqartinneqartassallutik, inuttat akissarsiaasa allassimaffiat isumaqatigiissummi uani ilangussamiittoq malillugu.

Imm. 2. Amutsiviliarluni tassanngaaniillu ingerlaarnermi amutsivimmiinermut qaammammut aalajangersimasumik akissarsiarititat 40 %-imik tapeqartinneqartassapput.

Imm. 3. Amutsivimmiitilluni atorfimmut atatillugu angalanerup saniatigut aningaasartuutit akilerneqartassapput Kalaallit Nunaanni atorfilinnut malittarisassat (tjenestemandinut) atuut-tut malillugit.

Imm. 4 Amutsivimmiinneq aalisarfimmiit illoqarfimmut amutsivimmiiffissamut naatsorsor-lugu ima sivisutigisimappat inuttaq qaammatisiutit ulluanni ullaat 55-it sinnerlugit amutsivinniinnerni akissarsiarititanik akissarsiaqartinneqarsimalluni bonusisitsiffiunngitsumik, taava inuttaq taanna misileraalluni aalisarnerni akissarsiarititat nalinginik akilersorneqalissaq. Piffissaq kilisaammi aserortoortoqarsimanerata kingunerisaanik iluarsaassiviusoq amutsivim-miinnertut naatsorsuunneqartassaaq.

Imm. 5. Umiarsualivimmiinnerni inuttat ullormi unnuamilu tikiffiusumi, ullormi unnuamilu tulliuttuni kiisalu ullormi unnuamilu aallarfimmi aalisarnermi akissarsiarititanik akissarsiaqartin-neqartassapput. Ulluni unnuanilu taakku akornanniittuni amutsiviniinnerni akissarsiariti-tanik akissarsiaqartitsisoqartassaaq, takuuk inuttat akissarsiaasa allassimaffiat.

§ 6 - Akissarsitsinerit il.il.

Akissarsiat kiisalu bonusiassatut naatsorsorallakkat 75%-ii aalisarnerup naammassinerata kingorna sainngisamik piaartumik akiliutigineqartassapput.

Imm. 2. Akissarsiat il.il. akissarsianut kontomut Kalaallit Nunaanni Danmarkimiluunniit aningaaserivimmiumut kilisaammi inuttap toqqassallugu isumagisassaanut ikineqartassapput.

Imm. 3. Inaarutaasumik bonusiassat tuniniaanermut immikkoortortaqarfiup pitsaassutsi-
nik misissuereerluni pisat pitsaassutsimikkut amigaateqarnerat pissutigalugu akit appatin-
neqartariaqarpata taamaaliortoqarnissaanik nalunaaruteqarnerata kingorna sainngisamik
piaartumik akiliutigineqartassapput.

§ 7 - Umiarsualivimmuinneq.

Umiarsualivimmittarnerit sainngisamik siviktsuinnaatinniarneqartassapput.

Imm. 2. Umiarsualivimmerni kilisaammi inuttat ullut tamaasa, taakkununngalu ilanngul-
lugin sapaatini nalliuutunilu, ullormut nal. ak. 8-ni sulinissaminut pisussaapput.

Imm. 3. Pigaartuunerni: Ulluni unnuanilu tikifinni aallarfinnilu avataaniinnermi pigaartuusi-
magaanni taanna nal. ak. 8-nik naatsorsuinemut ilaatinneqartassaaq.

§ 8 - Misileraalluni aalisarneq.

Misileraalluni aalisarnerni qaammammut aalajangersimasumik akissarsiaqartitsisoqartas-
saaq, taakkulu aalisarnermi akissarsiarititat pingasoriaataannik annertussuseqartinneqartas-
sapput kiisalu tonsikkuutaarlugin pisanit tulaassanit tunisanillu bonusiassanik tapeqartinne-
qartassallutik. Misileraalluni aalisarnerni qaangiuttoornersiaqartitsisoqarsinnaanngilaq.

§ 9 - Avataasiornermiit amutsivimmut.

Amutsivinniinnerni sapaatip akunneranut suliffik nal. ak. 40-nik sivisussuseqartassaaq, taan-
nalu inissinneqartassaaq sabinngisamik arfininngornerit kiisalu sapaatit nalliuuttullu sulinngiffi-
utinniarsaralugit.

§ 10 - Ukiut suliffigisimasat sivisussusaat aallaavigalugit tapisiat.

Kilisaammi inuttaanermi ukiut suliffigisimasat sivisussusaat aallaavigalugu ima
tapeqartitsisoqassaaq:

- a) Ukiut ataaseq sulereernermeri: Piffissami sulinngiffeqarnermi katersaniit
naatsorsuinermi 130 %-imiit 135 %-mut qaffanneqassapput.
- b) Ukiut marlut sulereernermeri: Piffissami sulinngiffeqarnermi katersaniit
naatsorsuinermi 135 %-imiit 140 %-mut qaffanneqassapput.
- c) Ukiut pingasut sulereernermeri: Piffissami sulinngiffeqarnermi katersaniit
naatsorsuinermi 140 %-imiit 145 %-mut qaffanneqassapput.
- d) Ukiut sisamat sulereernermeri: Piffissami sulinngiffeqarnermi katersaniit
naatsorsuinermi 145 %-imiit 150 %-mut qaffanneqassapput.

Imm. 2. Kilisaammi inuttat akissarsiat qaffakkiartortarneri pineqartut naapertorlugu ukiut
suliffigisimasai malillugit naatsorsorneqartassapput.

Imm. 3. Ukiut suliffiit malillugit akissarsiat amerliartornerisa naatsorsorneqarneranni qaam-
matinut ilivitsunngortinneqartassapput.

Imm. 4. Isumaqtigiissut una naapertorlugu kilisaammi inuttat Royal Greenland A/S-ip kili-
saataataaniit toqqaannartumik Royal Greenland A/S-ip kilisaataataanut allamut nuuttut su-
liaminnillu allanngortitsinatik ingerlatsiinnartut ukiut suliffiit malillugit akissarsiat amerli-
artornissaattut katersareriiKKatik attatiinnassavaat.

Imm. 5. Malittarisassanit siuliani taaneqartunit qaffasinnerusumik inissiisoqarsinnaavoq immikkorluinnaq pissutissaqartillugu.

Imm. 6. Inuttaaginnarnissaq aallaavigalugu ukiut suliffigisimasat aallaavigalugit naatsorsuinermi ilaatinneqassapput: Feriarnermi, napparsimanermi, meerartaarnermut qitornavissiartaarnermullu atatillugu kiisalu qinikkatut pisortanillu toqqakkatut suliassaqartitaanermi sulinngiffeqarnerit.

§ 11 - Soraarnerussutisiassanut akiliutissat taakkualu akilerneqartarneri.

Isumaqtigiissut manna malillugu SIK-p Soraarnerussutisiaqalernissamut Aningaasaateqarfianut SISA-mut sukkulluunniit atuuttumut kilisaammi inuttat ilaapput.

Imm. 2. Isumaqtigiissut malillugu kilisaammi inuttamut 18-nik ukioqalereersimasumut soraarnerussuti-siaqalernissaanut isumaqtigiissummi matumani tamakkiisumik akissarsianit taaneqartut aallaavigalugit akilerneqartassapput:

- | | |
|------------------------|-------|
| 1. aprili 2024-miit: | 9 %. |
| 1. januaari 2025-miit | 10 %. |
| 1. januaari 2026-miit: | 11 %. |

Imm. 3. Akiliutigineqartup agguataarlugu pingajorarterutaa kilisaammi inuttamut pigitinneqarloq kilisaataatilimmullu pingajorarterutaata aappaa pigitinneqarluni. Soraarnerussutisiaqartitsisoqartassaaq soraarnerussutisiaqalernissamut aaqqissuussinermi malittarisasstat aalajangersakkat naapertorlugit.

Imm. 4. Soraarnerussutisiassat qaammatikkaartumik Soraarnerussutisiaqalernissamik Aningaasaateqarfimmut SISA-mut akissarsititsisoqartillugu akiliutigineqartassapput.

§ 12 - Qaangiuttoornerit.

Qaangiuttoornissaq sapinngisamik pinaveersaarniarneqartassaaq. Peqquneqarluni qaangiuttoornerit tamatigut kilisaatip naalagaanit imaluunniit maskinchef-ianit uppernarsarlugit

atsiorneqartassapput. Kinaluunniit nammineq qaangiuttoonerminik uppernarsaalluni atsior-sinnaatitaanngilaq.

Imm. 2. Sulianut umiarsualivimmiinnermi peqquneqarluni suliarineqartunut nal. ak. arfineq pingasut sulereernermermi qaangiuttoornersiaqartitsisoqarsinnaavoq. Avataaniitilluni sulinermi aamma amutsiviliarluni ingerlaarneq unitsinneqarpat piffissami tassani qaangiuttoorner-siaqartoqarsinnaanngilaq.

Imm. 3. Nal. ak. ataatsimut qaangiuttoornersiat annertussuseqarput amutsivinniinnerni qaammammusiarititat 1/173,33-iisut, taakkulu 50 %-imik tapeqartinneqarlutik.

§ 13 - Sulinngiffeqarnerit.

Piffissami sulifflusumi immikkut sulinngiffeqarnerani (ferieqarnermi) akissarsiassanik kater-sisoqarsinnaanngilaq. Piffissaq sulifflusumi qaammatinik marlunnik sivisussuseqartoq qaammatit marlut sulinngiffeqarnissamik malitseqartinneqartassaaq, tassanilu amutsivinniin-nerni akissarsiaqartitsinertut akissarsiaqartitsisoqartassalluni.

Imm. 2. Piffissamik sulinngiffeqarfissamik katersineq najugarisamiit aallarnerup aqaguaniit naatsorsorneqalertassaaq. Piffissamik sulinngiffeqarfissamik katersineq niunerni unitsinne-qartassaaq. Piffissap sulinngiffeqarfiup (freerfiup) naatsorsornera najugarisamut tikinnerup aqaguaniit aallartinneqartassaaq ullullu katersarisimasat nungukkaangata taamaatittassal-luni.

Imm. 3. Piffissaq piffissamit niuffimmiit piffissap sulinngiffeqarfiup tungaanut ingerlasoq kiisa-lu piffissaq najugarisamit aallarnermiit ikinissap tungaanut ingerlasoq amutsivinniinnerni akissarsiaqartitsinertut akilerneqartassaaq. Piffissami sulinngiffeqarfimmi (freerfimmi) amu-tsivinniinnerni akissarsiaqartitsinertut akiliisoqartassaaq, taakkulu 30%-imik taperneqartas-sallutik.

Imm. 4. Piffissap sulinngiffeqarfiup (freerfiup) naaneraniit ikiartorluni aallarnissap tungaanut piffissamik ingerlasoqarsimatillugu amutsivinniinnerni akissarsiarititat naapertorlugit akiliiso-qartassaaq (utaqqinersiat), aatsaalli kilisaammi inuttaq piffissap sulinngiffeqarfissap

(freerfissap) pineqartup naaneraniit kingumut naatsorsorlugu qaammatit aqqaneq marluk ingerlanerini ullunik sulinngiffeqarfissanik (freerfissanik) pissarsiassaqaanngippat.

Imm. 5. Immikkorluinnaq ittunik pissutissaqaqtumik kilisaataatillit inuttat nalinginnaasumik paarlaattarnerat sanioqquterujussuarlugu iliuuseqartoqarpat, soorlu amutsivimmiittoqartillugu, piffissap sulinngiffeqarfissap (freerfissap) katersap naaneraniit ikeqqinnerup tungaanut tamakkiisumik ilaannakortumilluunniit utaqqinersiaqartitsisoqarsinnaavoq. Utaqqiner-siat amutsivinniingersiatut akilerneqartassapput.

Imm. 6. Ullut sulinngiffeqarfissat (freerfissat) atunngitsuukkut (freerfiginngitsuukkut) kingusinnerusukkut sulinngiffeqarnissamut (freernissamut) atatillugu atorneqartussanngorlugit kinguartinneqartassapput.

§ 14 - Angalanerit.

Kilisaatini inuttat najukkaminnit atorfinkkiartorlutik angalanermanni akiliunneqartussaatitaapput aammalu piffissat suliffioreersut naaneri tamaasa angerlamut akiliunneqartussaatitaallutik.

1. **Akiliunneqarluni angalanermi pisinnaatitaaffiit:** Kilisaammi inuttap pisinnaatitaaffigaa akiliunneqarluni angalanermi najukkamiit ikiartorfissamut sumiiffimmut tassunga, aammalu utimut najukkamut akiliunneqarluni angalanermut ikisimasussaatitaanermi sulinissami pilersaarutit naammassineri tamaasa.
2. **Angalanermi aningaasartuutit ikisimasussaatitaanerup avataani pippata:** Kilisaammi inuttaq pissutissaqavitsinnani kilisaammi inuttaanini maanaannaq unitsippagu, kilisaammi inuttap nammineerluni najukkamut aningaasartuutit akilissavai.
3. **Pissutissaviusut nassuiardeqarneri:** Maanaannaq kilisaammit inuttaanermi unititsinermi pissutissaviusut:
Napparsimaruloortoqartillugu, toqusqartillugu aamma/imaluunniit ilisisoqartillugu aamma allanik pingaarutilinnik aamma naatsorsuutiginngisamik pisut.

4. Angalanermut aaliangersakkat: Kilisaataatillip akisussaaffigaa angalanerit pisariaqartut pilersaarusiussallugit akilissallugillu, paragraffimi matumani pineqartuni, immikkoortoq 2-mi allanik ilanngussaqartoqarsimannngippat.

Imm. 2. Kilisaammi inuttat kilisaammut ikiartornerminni niuneerinullu atatillugu angalanerminni ullormusiaqartineqartassapput Kalallit Nunaanni atorfiliinnut malittarisassat (tjenestemandinut) sukkulluunniit atuuttut malillugit.

Imm. 3. Kilisaammi inuttat najukkamut / najukkamit angalaneranni pisortatigoortumik angallassisutit akikinnerpaat atorneqartassapput, aammalu angalaneranni nassatat oqimaappallaarutaat 20 kilogram tikillugu annertussusillit angalanermilu aningaasartuutaasimasut takussutissartaa-salu katarsorneqartut kilisaataatilimmum tunniunneqarpata kilisaataatilimmit akilerneqartassapput.

§ 15 - Atorfimmut atatillugu angalanermi aningaasartuutaanerusut.

Amutsivimmiitilluni atorfimmut atatillugu angalanerup saniatigut aningaasartuutit akilerneqartassapput Kalaallit Nunaanni atorfiliinnut malittarisassat tjenestemandinut atuuttut malillugit.

§ 16 - Fepiarneq feriarnersiuteqarnerlu.

Kilisaammi inuttaq ukiumoortumik akissarsiaqaatigalugu feriartarneq pillugu inatsit sukkulluunniit atuuttoq naapertorlugu tamakkiisumik akissarsiaqaatigalugu feeriarsinnaavoq.

Imm. 2. Fepiarneq pillugu Inatsisartut Inatsisaat nr. 10. 12. November 2001-meersumi § 2 naapertorlugu malittarisassat immikkut ittut ataani allassimapput.

Imm. 3. Kilisaataatillip akissarsiat 12,5 %-iannik feriarnersiuteqartitsissaq.

Imm. 4. Kilisaammi inuttat, qaamatikkuutaartunik imaluunniit sivilsunerusumik sulisitaasut taamalu nalliuutuni ulluinnartigoortuni, ulluni napparsimaffiusuni assigisaanniluunniit

akissarsiaminnik ilanngaassivigineqartanngitsut feriarnermanni feriarnersiutinut taarsiullugu akissarsiaqassapput, pisariaqassappat § 16, imm. 2mi maleruagassat malillugit nerisat nalingat ilanngullugu naatsorsorneqartunik. Feriarnermi akissarsiaqartitsisoqassaaq nalunaaquttag akunneri, akissaateqarluni sulisuuusup ukiumi katersiviusumi aalajangersimasumik akissarsisutigisai, naapertorlugit. Kiisalu immikkut ittunik feriarnersiuteqartitsisoqassaaq akissarsiat ukiumi katersiviusumi akissarsiarineqarsimasut 1,5 %-iannik annertussusilinnik.

Imm. 5. § 12 malillugu feriarnersiutit naatsorsorneqarneranni akissarsiat feriarnerup nalaani akiliutigineqarsimasut, feriarnersiutisiaritissimasat aamma feriarnersiutit immikkut ittut aki-liutigineqarsimasut ilaatinneqassanngillat. § 14, imm. 1 malillugu feriarnersiutit immikkut ittut naatsorsorneqarneranni feriarnersiutisiaritissimasat aamma feriarnersiutit immikkut ittut aki-liutigineqarsimasut ilaatinneqassanngillat.

Imm. 6. Soraarnermi aningaasarsiat 12,5 %-ii sulinngiffeqarnersiutissatut tunniunneqassapput. Suliunnaarnermi ukiumut katersiviusumut kiisalu siusinnerusukkut ukiup katersiviusup, akissaateqarluni sulisuuusup soraarnermigut feriarfigismanngisaata ilaanut feriarnersiutit § 12 malillugu naatsorsorneqassapput.

Imm. 7. Sulinngiffeqarnermi aningaasanik pisassanik piumasaqarneq sulisitsisumut saqqumiunneqassaaq ukiup sulinngiffeqarfissaasimasup qaangiutereernerani kingusinnerpaamilli qaammatit pingasut qaangiutsinnangit. Taamaannngippat aningaasat SIK-p Sulinngiffeqarnermut Aningaasaateqarfianut nakkassapput.

§ 17 - Napparsimaneq aamma sulitillunilu ajoquserneq.

Kilisaammi inuttaq napparsimanini pissutigalugu sulisinnaanngippat, taassuma kinguneranik sulinngin-neq inatsisinik unioqqutitsinani sulinnginnertut isagineqassaaq, sulisoq sulinermini piaaraluni mianersuaalliorujussuarluniluunniit napparsimalersimanngippat imaluunniit inuttanngor-nermini salloqittaalluni napparsimanini nipangiusimasimappagu.

Imm. 2. Napparsimasoqartillugu, napparsimanersiuteqartitsisoqassaaq:

- Aalisarnertulli akissarsiat, uku ilanngullugit: Ukiut suliffigisimasat sivisussusaat aallaavigalugit tapisiat aamma Soraarnerussutisiassanut akiliutissat taakkualu akilerneqartarneri.
- Qaammatit sisamat tikillugit akissarsiaqartitsisoqartassaaq.

Imm. 3. Napparsimanerup nalaani soraarsitsisoqassappat: Kilisaammi inuttaq qaammatit sisamat sinnerlugit napparsimasimaguni qaammammik ataatsimik siumoortumik ilimasaarneqarluni soraar-tussanngortinnejarsinnaavoq.

Soraarsitsinerup atuutitinneqarnissaanut piumasaqaataavoq qaammatit sisamat napparsimaffiit taakku naanerannut atatillugu soraarsitsisoqasssoq aammalu inuk pineqartoq suli napparsimatillugu, kisiannili atuutitinneqarsinnaaneranut apeqqutaanngilaq inuk pineqartoq soraarsitsinissap nalunaarutigineqareerernerata kingorna suliffimminut utersimappat.

Imm. 4. Kisiannnili aalajangersagaq malillugu kilisaammi inuttattut atorfecarneranit soraarsitsisoqarsimappat, atorfinitsetseqqittoqartariaqarpoq inuk pineqartoq sulileqqissinnaalerpat aammalu Kilisaataalimmi pineqartumi inuup pineqartup sulinissaa atorfissaqartineqarpat.

Imm. 5. Kilisaataatilik pisussaavoq kilisaammi inuttap napparsimavimmit angerlarnermi kingorna kilisaammut ikeqqinnissaminut imaluunniit angerlamut angalinissaminut utaqqinerani inissaqartitsinissamut.

Imm. 6. Ajoqusemeryt Sulitilluni Ajoquusersinnaanermut Sillimmasiisarnermut Ataatsimiititaliamut (Nævnet for Arbejdsskadeforsikring-imut) nalunaarutigineqartassapput. Sillimmasiisarfimmit ullormusianik akiliuteqartoqassappat taakkunannga kilisaataatlimmut akilerneqassapput napparsimanerup nalaani kilisaataatillip inuttamut napparsimasumut akissarsaritissimasaasa naliganik anginerunngitsumik.

Imm. 7. Kilisaammi inuttaq nakorsap naliliinera naapertorlugu ullut 14-it sinnerlugit napparsimassanga-tinneqaruni angerlamut angalanissaminut akiliunneqassaaq.

Imm. 8. Napparsimaneq nakorsap uppernarsaaneratigut uppernarsarneqarnissaa piumasarineqarsinnaavoq.

Imm. 9. Nakorsat uppernarsaataat imm. 8 malillugu piumasarineqartut kilisaatatilimmit akilerneqassapput.

§ 18 - Qasuersaartussaatitaaneq.

Kilisaataatillip minnerpaamik Søfartsstyrelsen-imiit qasuersaartussaatitaanerit pillugit malittarisassat. Taamaattorli sinniisoq imaluunniit kilisaammi inuttat pingaartuunermut pilersaarusiortoqartillugu ilaatinneqartassapput.

Imm. 2. Kilisaataatilik aamma inuttat imm. 1-mi isumaqtigiissut avaqqullugu qasuer-saartussaatitaaneq allanngortissinnaavaat piffissanik suliffiusunik pilersaarusiortillutik imaluumniit suliamik aalajangersimaqqiisaartumik aaqqissuussiniartillutik.

§ 19 - Toqukkut qimagaanersiutit.

Kilisaammi inuttaq atorfecarnermi nalaani toqusimappat aapparisaanut tassungalu naligitat imaluunniit qitornaanut 18 inorlugit ukiulinnut qimagaasunut toqusup pilersugassarisimasaanut qimagaanersiutit ataani allassimasut naapertorlugit tunniunneqassapput.

Kilisaataatilimmi tessani sulisimappat:

Ukioq ataaseq: Qaammat ataaseq aalisarnertulli akissarsiassat naliginik.

Ukiut marlut: Qaammatit marlut aalisarnertulli akissarsiat naliginik.

Ukiut pingasut sinnerlugilluunniit: Qaammatit pingasut aalisarnertulli akissarsiassat naliginik.

§ 20 - Sulinngikkallarnerit immikkut ittut allat.

Ilinniaqqinniarlutik siunertanulluunniit immikkut ittunut allanut:

Kilisaammi inuttat ukiuni marlunni taakkuluunniit sinnerlugit atorfecareersimasut ilinniaqqinniarlutik siunertanulluunniit immikkut ittunut allanut tunngatillugu sulinngiffeqarniarlutik tunngavilersukkamik qinnuteqartut ilinniartuunersiutaajumaartussat saniatigut qaammammut minnerpaamik 10.000 koruuninik annertussusilimmik ajunngitsorsiassaqaarlutik sulinngiffeqartitaanissamin-nut akuerineqarnissartik

nalinginnaasumik naatsorsuutigisinnaa-vaat. Taamatut ajunngitsorsiassaqaqtinnejartut sulinngiffeqartitsinermi patsisissaatinneqar-tassaaq pineqartoq suli kilisaammi inuttatut atorfeqartitaanera.

- Kilisaataatillip pisussaaffigaa aningaasaartuutit akilissallugit akuerisaasumik pikkorissarnerni nutarterinermi aammalu kilisaammi inuttanut allagartaqartussaanermut pikkorissarnerit, inuttaq minnerpaamik ukioq ataaseq atorfeqarsimappat.

Pikkorissarnerit makku pineqarput, inuttat piginnaasaat ataavartumik pigiinnarnissaa anguniarlugit imaluunniit piginnaasaannik pitsangorsaanerni inatsisit aammalu kilisaataatillip piumasaqatai malillugit.

Imm.2. Ilaquttat qanigisat napparsimaruloortillugit, toqusoqartillugu aamma/imaluunniit ilisaanerini:

Ilaquttat qanigisat napparsimaruloortillugit, toqusoqartillugu aamma/imaluunniit ilisaanerini inuttaq akiliunneqarluni angalasinnaatitaavoq aamma angalanerup iluani unikkallarnerni aningaasaartuutinut aammalu akissarsiaqarluni sulinngiffeqarsinnaatitaal-luni aalisarnertulli akissarsiaqartinneqarluni ullut arfineq pingasut tikillugit, aamma ullunut 20-inut ilaneqarsinnaallutik kilisaammi inuttap kilisaammut ikinissaa kilisaammi ikisimasussaanerup iluani angalanermi imaluunniit allat aaqqissuussinerit pisinnaanngiippata.

Sulinngiffeqarsinnaatitaanerup sivisussusaa pillugu kilisaataatillip aamma kilisaammi inuttap akornani isumaqtigiissutigineqassaaq, ikiartortussaanerit pilersaarutaareersut naliginnaasut malillugit.

Pissutsilli immikkut itsillugit qanigisaasoq perululluni napparsimalereersimasoq napparsimavimmullu unereersimasoq, najukkamiit allamut ingerlanneqarpat piffissaq sulinngiffeqarfiusoq pissutsit immikkut itsillugit, piffissaq sivitsorneqarsinnaavoq, piffissamillu sivitsuisoqassappat tamanna pillugu kilisaammi inuttap aamma kilisaataatillip akornani isumaqtigiissutigineqassaaq.

Imm. 3. Qanigisat ima paasineqassapput: Angajoqqaat, aappaq katissimasaq taamatulluunniit naatsorsuussaq, qitornat aamma qatanngutit, kisianni aapparisap katissimasap taa-matulluunniit naatsorsuussap ilaqtai pinnagit.

Imm. 4. Kilisaataatillip pisussaaffigaa ingerlaannartumik isumagissallugu kilisaammi inuttap nunaliaanneqarnissaa, nalunaaruteqartoqareernerata kingorna ilaquqtat qanigisat napparsimaruloortillugit, toqusoqartillugu aamma/imaluunniit ilisaasoqartussanngornerani.

§ 21 - Qinikkatut pisortanillu toqqakkatut suliassaqartitaaneq.

Kilisaammi inuttat qinikkatut pisortanillu suliassaqartitaanerit pillugit qinikkatut pisortanillu toqqakkatut suliaqarneq pillugu Kalaallit Nunaanni nalunaarut sukkulluunniit atuuttoq naapertorlugu sulinngiffeqarsinnaatitaapput.

Imm. 2. Imm. 1 malillugu suliffigisamiit qimagusimaneq piffissami nalinginnaasumik sulifiusussaagaluami sumiginnaanertut isigneqassanngilaq. Suliffimmiiit qimagusimanissaq sapinngisamik sioqqutsilluarluni kilisaataatilimmut nalunaarutigineqassaaq.

Imm. 3. Pisortanit suliassaqartitaaffinni allani SIK-p Peqatigiiffiini siulersuisuni aamma SIK-p Inuuusuttaani siulersuisunut ilaasortat imaluunniit SIK-p siulersuisuunerini ilaasortat pisortat oqartussaasoqarfiinit piumaffigineqarneq tunngavigalugu ilaasortaaffigineqartut imm. 1-mi 2-milu malittarisassat tunngavigineqassapput.

Imm. 4. SIK-p siulersuisuuneri aamma SIK-p Inuuusuttaasa siulersuisuinut ilaasortat, SIK-p ataatsimeersuarnerini aamma Nakkutilliisoqarfegarnerani peqataanermi sulinngiffeqartitsisoqassaaq aalisarnermi akissarsiartulli annertussusilinnik akissarsiaqartinneqarlutik, aamma SIK-p aamma SIK-p Inuuusuttaasa siulersuisuini ilaasortat ataatsimiinnerini amerlanerpaamik ukiumut sisamarlarlutik.

Imm. 5. SIK-p Peqatigiiffiini siulersuisut, SIK-p siulersuisuunerini aamma SIK-p Inuuusuttaasa siulersuisuinut ilaasortat, akissarsiaqaratik sulinngiffeqarnissartik kissaatigippassuk taman-na akuerineqartariaqarpoq. Taamatut sulinngiffeqartitsisoqarsinnaavoq ukiut ataasiakkarlugit.

§ 22 - Naartuneq, ernineq qitornavissiartaarnerlu.

Kilisaammi inuttat inatsisit sukkulluunniit atuuttut naapertorlugit naartunermi, erninermi meeravis-siartaarnermilu sulinngiffeqartussaatitaavoq.

Imm. 2. Qinnuteqarnikkut piumasarineqarsinnaavoq angalanermi ataatsimi sulinngiffeqarnissamut kilisaammut ikeqqinnissap tungaanut, kilisaammi inuttaasutut aalisarnertulli akilerneqartumik sulinngiffeqarsinnaatitaalluni.

Naartunermi, erninermi meeravissiartaarnermilu Inatsisartut inatsisaat nr. 5, 19. november 2020-meersoq naapertorlugu sulinngiffeqarsinnaatitaavoq, inatsik ullumikkut atuuttoq. Takussutissiaq una meeqqamik ataatsimik naartunermi erninermilu akis-sarsiaqarluni sulinngiffeqarsinnaatitaanernik takutitsisuuvvoq***:

Anaanaasoq	Ataataasoq/anaanaaqataasoq
Erninissaq sapaatit akunnerinik sisamanik sioqqullugu (naartunermi sulinngiffeqarneq)	
Erninerup kingorna sapaatit akunneri 15-it (erninermut atatillugu sulinngiffeqarneq)	Erninerup kingorna sapaatit akunneri pingasut (ataataasutut sulinngiffeqarneq)*
Angajoqqaatut Sapaatit akunnerini 21-ni sulinngiffeqarneq**	Angajoqqaatut Sapaatit akunnerini 21-ni sulinngiffeqarneq**

- * Ataataasoq meeqqap inunngorneraniit sapaatit akunnerini siullerni 15-ini ataataasutut sulinngiffeqassaaq meerartaarneq.
- ** Angajoqqaatut sulinngiffeqarneq angajoqqaat akornanni agguarneqarsinnaavoq angajoqqaalli marluullutik ataatsikkoorlutik angajoqqaatut sulinngiffeqarsinnaangil-lat.
- *** Marlulinermi imaluunniit amerlanerusunik ataatsikkut meerartaarnermi anaanaasup sulinngiffeqarfia sapaatit akunnerinit 15-init sapaatit akunnerinut 19-inut sivitsorne-

qassaaq angajoqqaatullu sulinngiffeqarneq sapaatit akunnerinit 21-init 25-nut sivit sorneqarluni.

§ 23 - Isumaqtigiinngissutit kinaassusersiortumillu soraarsitsinerit.

Tamanna pillugu apeqqutit aaqqiagiinngissutit suliarineqartarnissaannik tunngaviusumik isumaqtigiisummi aalajangersakkat naapertorlugin suliarineqartassapput, Naalakkersuisut aamma Sulinermik Inuussutissarsiuteqartut Kattuffiata akornani isumaqtigiissut malil-lugu.

Inunniq ataasiakkaanik soraarsitsisinnaaneq atorneqaraangat tamanna kinaassusersior-nermik tunngaveqartassanngilaq.

§ 24 - Soraarsitsineq / soraarniuteqarneq.

Kilisaataatilimmit soraarsitsineq kilisaammi inuttalluunniit tungaaniit soraarniuteqarneq qaammammik ataatsimik qaammatip naaneranut nalunaaruteqarluni soraarsitsisinnaavoq soraarsinnaallunilu.

Imm. 2. Ukiut marluk ingerlaannartumik atorfegareernermermi piffissaq kilisaataatillip soraarsitsinermut piffissaq qaammatinik marlunnik ilassavaa.

Imm. 3. Sumiginnaarujuussuarneq imm. 1 aamma 2 naapertorlugin ilimasaarivissap atorunnaar-neranik kinguneqartassaaq. Sumiginnaasoq akissarsisinnaajunnaarlunilu, bonusi-sisinnaajun-naarlunilu, najugaqartitaajunnaarlunilu allatigut ajunngitsorsiassaarutissaaq soorluttaaq akili-unneqarluni angerlarsinnaajunnaarsitsisoqartartoq.

Imm. 4. Soraarsitsineq / soraarniuteqarneq siumoortumik kilisaataatilimmit kilisaammi inutta-milluunniit allaganngorlugu nalunaarutigineqartassaaq.

§ 25 - Sulisut sinniisaat.

Kilisaammi inuttat isumaqtigiisummi uani taaneqartut uunga ilaatinneqarput: Naalakkersuisut, Finansministeriet aamma Sulinermik Inuussutissarsiuteqartut Kattuffiata

akornanni sinniisut pillugit isumaqatigiissut, sukkulluunniit atuuttoq, ataanilu immikkut taaneqartut ilanngullugit:

Imm. 2. Tamatuma saniatigut sulisut sinnisaattut toqqameqartoq § 24-mi piffissaq soraartsassanngofiitsinissamut/soraarniuteqamissamut ilimasaariffissaq eqqaassanngikkaanni ilaminit allaanerusumik atugassaqartitaassanngilaq.

§ 26 - Taarsiissuteqartarneq.

Kilisaammi inuttap kilisaammi inuttaanerani kilisaataatilik pisussaavoq kilisaatip ajutoorneranut/ ajunaarneranut atatillugu Danmark-immi umiartortut pillugit inatsisaanni aalajangersakkat malillugit taarsiissuteqamissaminut.

§ 27 - Aningaasaateqarfiiit.

Ulloq isumaqatigiissutearfiup ulluliussaaniit aallartittumik Aningaasaateqarfinnut akiliuteqartoqartassaaq:

1. Qaammarsaanermut Ilinniarnissamullu Aningaasaateqarfik.

Ullormut 5,40 koruunit kilisaammi inuttamut ataatsimut akiliutigineqartassapput.

2. Sulinnngiffeqarluni angalermut aningaasaateqarfik.

Ullormut 2,40 koruunit kilisaammi inuttamut ataatsimut akiliutigineqartassapput.

3. Isumaginninnermut Aningaasaateqarfik.

Ullormut 2,40 koruunit kilisaammi inuttamut ataatsimut akiliutigineqartassapput.

§ 28 - Isumaqtigiissutip atortuulerfia atorunnaarsinneqarneralu.

Isumaqtigiissut manna atuutilissaaq ulloq apriilip 1-ani 2024-mi.

Imm. 2. Isumaqtigiissut qaammatinik pingasunik siumoortumik ilisimatitsinikkut siusinnerpaamilli marsip 31-ani 2026-mi atorunnaartussanngortinneqarsinnaavoq.

Imm. 3. Isumaqtigiissutip atorunnaartinneqarnerata kingorna atorunnaarsitsisoqannginnejrani akissarsiat atuuttut naapertorlugit akissarsiaqartitsisoqassaaq, nutaamik isumaqtigiis-

suteqartoqarnissaata aammalu isumaqatigiissutit nutaat atuutilersinneqarnissaata tungaanut.

Nuuk, ulloq septembarip 20-ani 2024

Sulinermik Inuussutissarsiuteqartut Kattuffiat

Royal Greenland A/S

Jess. G. Berthelsen

Egalunnguaq Kristiansen

Kattuffiup siulittaasua

Inuttalersuinermi aqutsisoq